

史料旬刊

第三十期

金瓶梅詞話

卷一百一十五

中華民國二十三年三月二十一日出版

史料旬刊第三十期

編輯所 故宮博物院文獻館
 發行所 神武門外發售室
 印刷所 京華印書局



價目表		郵費	
每旬一冊	四角	外埠	每期一角
預定半年 十八冊	六元五角	外國	每期二角
預定全年 三十六冊	十二元	本院發寄刊物均交郵局掛號遞送以免遺失	

本市 商務印書館 中華書局
 上海 文明書局 世界書局及
 天津 其他各大書店均有代售

史料旬刊第三十期目錄

清乾隆朝福建督撫伍拉納浦霖等受賄被誅案

原件藏大高殿



(一) 魁 倫摺

(二) 浦 霖摺

(三) 上 諭

(四) 魁 倫片

(五) 上 諭二

(六) 姚 綦摺

(七) 魁 倫摺二

(八) 魁 倫摺
田鳳義

(九) 魁 倫摺三

(十) 長 麟摺
朱珪

(十一) 魁 倫摺四

(十二) 長 麟摺

(十三) 魁 倫片二

(十四) 魁長 倫麟 摺

(十五) 魁長 倫麟 摺二

(十六) 魁長 倫麟 摺三

(十七) 魁長 倫麟 摺
姚葵

韓德榮倡立邪教案 原件藏三所

(一) 碩 色 摺

(二) 阿里袞 摺

(三) 碩 色 摺二

(四) 準 泰 摺

(五) 準 泰 摺二

兩廣總督李侍堯奏覆查明暹羅與花肚番搆兵情形摺 原件藏三所

彙核嘉慶十七年各直省錢糧出入清單 原件藏三所 (八續已完)

關稅項下

(一) 閩海關

(二) 太平關

(三) 粵海關

(四) 坐糧廳

(五) 山海關

(六) 張家口

(七) 殺虎口

(八) 歸化城

(九) 龍江關

(十) 蕪湖關

(十一) 宿遷關

(十二) 臨清關

(十三) 南新關

清乾隆朝福建督撫伍拉納浦霖等受賄被誅案

魁倫摺

奴才魁倫跪奏爲臺灣匪徒滋事現在密爲籌備緣由恭摺奏聞仰祈聖鑒事
本月二十一日午刻據廈門同知黃奠邦稟報臺灣賊匪陳周陳光秀等聚衆
滋事於本月十三十四日攻破鹿仔港彰化縣城同知朱慧昌遊擊曾紹龍均
已被害等情奴才接閱之下不勝駭異當即前赴督臣衙門面商一切督臣伍
拉納即於二十二日自省起程馳赴廈門相機辦理查臺灣自五十三年大加
懲創之後雖間有匪徒結會之事均經地方文武隨時嚴辦卽本年正月間賊
匪陳光愛等糾衆滋事一案當經該鎮道即時拿獲多名審明辦理迺甫逾兩
月竟尙有愍不畏法之徒敢於光天化日之下攻縣戕官殊堪髮指諒茲小醜
不過烏合之衆現有鎮道重兵在彼自無難卽時撲滅伏念奴才仰蒙聖恩畀
以將軍重任於五十三年曾赴臺灣辦理善後事宜該處情形尙爲知曉現於
滿營內密挑精兵一千名暗爲預備硃批大概不至於此並札致督臣萬一有需用之處
奴才一接咨會立即帶領前往協同辦理再撫臣於本月初十日前往漳州府

致祭原任尙書蔡世遠現在尙未回省會城重地督撫均經外出奴才同副都統色克圖督率官兵加意彈壓一應事宜隨時酌辦斷不敢拘泥觀望亦不敢稍涉張皇合將奴才現在籌備緣由恭摺由驛馳奏伏乞皇上睿鑒謹奏乾隆六十年四月初九日奉硃批即有旨欽此 三月二十三日

附片

再查閩省自上冬以來米糧昂貴盜刦頻聞所有商民赴關呈報被刦移咨督撫各案業於本月十四日專摺奏明在案嗣於十七日接准督臣咨稱現派金門鎮總兵李芳園海壇鎮總兵特克什布等帶領水師官兵五千名會合勦捕等語兵船尙未出口適接臺匪滋事之信漳泉一帶自上秋被水後仰蒙皇上天恩加倍賑卹灾黎甚是感激迨至春夏之交米價日漸增昂現在每石糶錢七八千文不等合銀五兩以外即省城米價每石亦在四千七八百文合銀三兩以外且春間各處雨水頗多麥收未免歉薄現在早禾雖經插遍而低窪處所亦因雨多之故未見及時茂發查福寧府屬上年秋收較好糧價中平經撫

臣於閏二月初旬委員赴彼採買穀石薯絲由海運接濟漳泉聞已配載船隻因懼洋匪刼奪尙未得聞運到之信至於地方事務奴才不能詳細周知但風聞各州縣倉儲大半多非實貯似此情形內地尤覺可慮奴才在閩七載雖有奏事之責但地方官倉庫事件聞有虧缺經督撫設法辦理若混行冒瀆宸聰殊屬不曉事體今時勢至此再不據實陳明即是背負天恩喪盡良心之至奴才前此拘泥因循罪實難辭謹此密奏伏乞聖鑒同日奉硃批覽欽此

附片

再奴才正在封摺間適據藩司伊轍布送到二十二日所接泉州府知府張大本來稟內稱十九日申刻有向在泉州開行林華觀之子監生林文溶兄弟二人自臺回泉隨即傳進署中面詢據稱伊等素在鹿仔港開行生理與理番同知衙門貼近三月十三日四更時候突有賊匪多人擁入理番廳內署逢人便殺賊目陳光秀當被沈姓家人用劍戳死沈姓亦被亂賊砍斃同知朱慧昌當時被害十四日已刻羣賊往攻彰化縣城營兵不甚得力署彰化協張無咎都

司焦光宗彰化縣知縣朱瀾典史黃增運並在彰化彈壓之右營遊擊陳大恩同時被害賊匪留人守城又赴嘉義縣攻打不知吉凶賊頭姓陳名周全原籍南安縣人豎立大旗旗上寫大盟主朱四字逼脅居民從賊違者盡殺又同知沈颺解銀赴臺交卸後途中被賊圍住其起事根由因朱同知前署臺灣府事拿獲鳳山賊匪正法逸賊挾恨倡亂伊等自十七日逃出海口上船開行至十九日辰刻進蚶江口現回郡城並稱所言情事俱係目擊真知並無虛假等語據此奴才查連日並未接到臺灣鎮道來信亦未見其摺奏過省看此情形甚爲緊急嗣後續有所聞再行由驛馳奏同日奉硃批覽欽此

浦霖摺

福建巡撫臣浦霖跪奏爲遵例具奏事竊照存公銀兩如有常例外必需之處均應奏明動用臣查福建省獄囚不敷口糧節經奏准在於存公銀內找給在案茲據按察使錢受椿會同布政使伊轍布查明乾隆五十九年分各州縣監犯口糧併支更禁卒夜給燈油等項共銀二千二百九十五兩二錢五分零動

支各州縣額載囚犯月糧銀一千三百七兩一錢四分零又奉文撥湊公費銀六百兩通融勻給外尙不敷銀三百八十八兩一錢零循例於存公銀內動支等情具詳請奏前來臣查核冊開均係內結重案人犯按日計口支給數目悉屬相符並無浮冒所有前項不敷銀兩相應奏請照例在於乾隆五十九年分公費項下支銷臣謹恭摺具奏伏乞皇上睿鑒勅部查照施行謹奏乾隆六十年四月三十日奉硃批該部知道欽此 三月十七日

上諭

乾隆六十年五月初一日

奉旨福建省現有倉庫洋盜等案已有旨令魁倫查辦所有伍拉納應得處分俟魁倫查奏到日再降諭旨長麟著銷去加二級免其降調餘依議欽此

魁倫片

奴才魁倫跪奏上年漳泉一帶被水撫臣浦霖前往辦理賑卹一事奴才今年正月間已風聞得有辦理不妥之處查無實據不敢冒昧具奏昨因督臣伍拉

納現駐泉州饑民圍繞乞食札商浦霖向藩司提取漳州賑案內餘款銀六萬兩解往該處買米設廠施粥等情奴才於浦霖處曾見其來書並詢之伊轍布據稱此項銀兩原係督撫商同扣存尙未提用等語即此一事伊等居心行事誠不可問謹據實附片奏聞伏乞聖鑒謹奏乾隆六十年五月初六日奉硃批已有旨了欽此

上諭二

乾隆六十年五月初七日內閣奉上諭昨已降旨將伍拉納革職交魁倫等審辦閩省吏治廢弛已極現在清釐查辦一切正關緊要非福康安前往不足以資整頓福康安著卽調補閩浙總督計此時逆苗賊首石三保等當已就擒福康安於拿獲賊首後著卽馳赴新任伍拉納回至內地聽候魁倫等質審明確後卽著派員解送來京交軍機大臣嚴行究訊所有雲貴總督員缺著勒保調補其陝甘總督員缺著宜綿補授欽此

姚棻摺

新調福建巡撫臣姚棻跪奏臣接福康安密札告知閩省倉庫經魁倫奏稱多非實貯附近省城卽有盜船肆劫上廬宸衷令臣到閩後務將該省倉庫因何虧缺地方如何廢弛之處詳細查明會同魁倫據實參奏認真整飭斷不可代爲廻護並將一切應行辦理事件安速籌辦

硃批一汝能辦者卽辦有不能者俟福康安此時且不必張皇一

毋負聖恩簡調委任之至意等語諄切札知臣祇聆之下自維才識庸愚仰蒙皇上逾格隆恩委任甚重稍有人心敢不激發天良勉殫精力認真查辦臣前在閩省道府任內知藩庫每年奏銷時各州縣庫項俱係年清年欸未聞有虧缺之事惟各屬常平倉穀因濱海地方潮濕甚重每遇出陳易新交代盤查等事氣頭廠底不無盤折例應隨時買補平糶穀石亦應秋成買還偶遇糧價昂貴收買不齊無論是否民欠經該管上司查出卽著落經手原官暨交代出結之員勒限繳價存庫以備價平買補足額每間數年清查一次此從前辦理情形臣離閩十有餘年聞福康安任閩浙總督時亦經力爲整飭隣省俱所共知今相隔不過六七年該省倉庫因何多非實貯臣到閩後卽徹底清查如有缺

額會同魁倫據實參奏不敢稍爲瞻徇諱飾自取重咎一面設法妥爲籌補務期實貯無虧至海洋盜匪全在文武員弁實力稽查巡緝自不敢出沒無忌臣會同督臣暨水陸各提鎮嚴飭文武員弁同心勉力先查出海之船繼訪消贓之地使盜匪畏法斂跡倘文員徒留海捕具文武弁虛應會哨故事硃批「此最要」查出即行嚴參重辦不敢稍事姑息務期海疆綏靖上慰聖心廑注謹附片奏聞伏乞睿鑒謹奏乾隆六十年五月二十八日奉硃批俱已有旨欽此 五
月十二日

魁倫摺二

福州將軍兼署巡撫奴才魁倫跪奏爲候補人員不敷差委請旨揀發以資委用事竊奴才欽奉諭旨盤查各屬倉庫復蒙恩命兼署撫篆伏查定例遇有虧缺挪移倉庫之員應即摘印審辦委員接署又奏銷錢糧催徵不及五分例有離任處分閩省現在查辦倉庫錢糧將來經征州縣管糧丞倅分徵縣丞有干嚴議者甚多且本年鄉試內外簾官需員亦復不少現在候補試用人員除題

補外餘俱現署有缺不敷差委雖現奉恩旨大挑舉人分發各省試用但該員等初入仕途尙須甄別遇有繁要缺出驟難勝任合無仰懇聖恩勅部揀選知府二員丞倅四員并於在部候補知縣內揀發十員佐雜二十員俾迅速來閩以資差委庶於地方公事有益再查請揀人員例應會同督臣具奏奴才因在地方緊要督臣伍拉納遠在臺灣往返咨商恐稽時日當與藩臬兩司再四籌酌不敢拘泥成例謹專摺恭奏伏祈皇上睿鑒施行謹奏乾隆六十年五月二十九日奉硃批已有旨欽此 五月十二日

附片

臣魁倫跪奏前撫臣浦霖已於五月初六日起程進京前藩司伊轍布亦已於初十日起程合併附片奏聞謹奏

乾隆六十年五月二十九日奉硃批覽欽此 五月十二日

魁倫
田鳳儀摺

福州將軍兼署巡撫臣魁倫跪奏爲查過省城廳縣倉庫虧缺情形據實參奏

福建布政使臣田鳳儀

儀

仰祈聖鑒事竊臣魁倫欽奉諭旨同臣田鳳儀清查閩省各屬倉庫臣田鳳儀清查閩省各屬倉庫臣田鳳儀於五月初二日抵任臣魁倫亦於是日接署撫篆當即遣差齎摺恭謝天恩臣魁倫另將次第辦理事宜由驛馳奏在案臣等面同商酌以督臣伍拉納署按察司劉大懿現俱前赴臺灣撫藩俱有更動誠恐奸匿乘機生事宜於省城地方鎮靜彈壓臣魁倫檢查前撫臣浦霖移交命盜各案暨各州縣詳稟運米平糶事宜一切現行要件均須趕緊辦理臣田鳳儀卽赴司庫接收交代查藩司廣積庫向無額貯欸項底冊交代惟據前司伊轍布交到現存正雜銀兩共二百九十一萬六千四百一十五兩零內乾隆五十九年各州縣額徵地丁除漳泉等屬被水應免銀十四萬兩實應完銀一百一十萬零截至五月初二日止收銀三十三萬餘兩奏銷已屆核計不過十分之三明係各州縣將錢糧任意侵挪以致不能完解且所解三十三萬多在本年開徵以後更難保無挪新掩舊情弊又五十八年以前代報未完州縣正雜錢糧十三萬兩又代報未完秦爲幹李振文等罰俸捐復等銀四千八百四十

餘兩是閩省庫項虧空正多不獨倉儲之非實貯也臣魁倫臣田鳳儀隨提訊藩司書吏嚴光曾元吉羅嘉信等據稱閩省倉庫虧缺從前奏過穀六十四萬餘石銀三十六萬餘兩本非實數五十六年伊前司任內經督撫飭令各屬採買倉穀彼時照糧派買冀圖彌補虧空嗣因百姓嘖有煩言兩年未得買全又咨追本員及道府分賠亦未繳齊現在倉庫兩項又有續虧前後約共二百五十萬兩以上等語臣等訪聞各屬虧缺首郡較多即面詢福州府知府鄧廷輯據稱所屬倉穀除詳明動撥碾糶例得開除外餘存無多計府城兩廳兩縣虧缺五萬三千餘石海防廳係李浚原福昌二員福糧廳係安靜李浚原李振文三員閩縣係方維憲秦爲幹李堂三員侯官係黃呈翬路釗陳惠三員至於庫項福糧廳李振文缺銀二千六百七十一兩五錢二分五釐閩縣歷任知縣郭廷魁楊希燭焦長發沈世雋徐夢麟李堂六人共虧銀五萬七千六百七十三兩一分六釐又李堂一人續虧銀二千一百六十兩侯官縣歷任知縣楊廷理李堂黃呈翬陳惠四人共虧銀九千八百七十四兩一錢二分三釐又謝資姚鶴齡雷元運三人續虧銀六千一百三十七兩六錢一分四釐七毫等情並開